

五  
種  
還  
規

# 五種遺規

○.....  
 定價 五角  
 ○.....  
 運費 酌省 遠埠 加費

校閱者：千 雨 田

出版者：經緯教育  
 聯合出版部

發行者：經緯書局  
 上海四馬路山東路交通路口

代售者：新文化書社  
 上海四馬路中市

經售處：各大書局

—— 印 翻 准 不 有 所 權 版 ——

版 出 月 八 年 四 十 二 國 民

# 藏書五種敘

隆古之世。人心醇厚。習尚不紛。上之所以爲教。下之所以爲學者。畢出於一途。生其時者。日聞正言。觀正訓。莫不各愛其身。而恥爲不善。僉壬敗類。自顧無所容。其立法之善如此。故其教之成。處則爲忠信篤敬之儒。而出亦可以備天下國家之用。及其衰也。國異政。家殊俗。一切澆漓狡黠之風。日昌日熾。而靡所底止。於是上之人方憂其弊。欲以嚴刑峻法懲之。而不能。無他。教化之未先。而觀型之無自。非一朝一夕之故。其所由來漸矣。故曰少成若天性。習慣成自然。不易之理也。粵西陳榕門先生。當代名儒。作宦五十年。憂國愛民。朝野共戴。公餘之暇。著藏書五種。一曰養蒙士。二曰訓民俗。三曰嚴閭閻。四曰儆官箴。五曰戒胥吏。勤搜博採。凡典籍之垂訓。名賢之格言。及學

士大夫婦人女子一言一行。有關名教者。莫不檢擇以標於簡編。使人觸目警心。誦之忘倦。夫人雖至頑。一旦聞忠臣孝子義夫節婦之行。莫不流連感嘆。傳爲美談。何則。天性之良。未盡泯也。故觀是書而不知勸者。必非人情。惜其書僅流行於吳越楚粵諸省。而蜀以遼遠未及見。自林君青山解組湖南。攜有是書。欲重刻播之而未果。今林君已辭世矣。其姪興宗。方偕仝人捐貲重刻。以廣榕門先生之傳。其意甚美。而其裨益於人心風俗爲甚大。固余之所有志而未逮者也。敢辭固陋。爰筆而爲之敘。

乾隆三十七年十二月二十二日丹稜彭端淑書於錦江書院

# 重刷藏書五種序

歲戊子。予主講斗山書院。取陳文恭養正遺規之意。定爲學規。間又擇其訓俗教女從政。在官諸編中。有關讀書作人之法者。與諸生講習。羣樂信而從之。蓋謂精粗本末。學者之要務盡是已。一日有客自三邑來。叩門求見。予進之於澄心堂上。詢其姓字。曰彭某。卽出一緘以示。啓誦之。則予趙玉衡師手書也。言彭君之尊人國治先生。方募印陳文恭五種藏書。以廣流傳。乞予一言爲引。予嘉其用意良厚。又重以師命弗敢辭。因徐謂彭君曰。君亦知人心風俗之所以盛衰乎。士者四民之首。而人心風俗所視爲轉移者也。當其盛也。必有人焉。言坊行表。爲之倡道。維持於其中。及其衰也。亦必有人焉。口誦詩書。身違禮義。使世人尤而效之。而名教之閑。遂迄於潰決而不可救止。故予嘗謂人心之壞。不壞於不識字不讀書之人。

而壞於士人。則欲風俗之厚。亦不厚於不識字不讀書之人。而厚於士人。何者。士習不振。則於非士者。又何責也。尊甫之意。毋亦有鑒於是乎。彭君方起而對客。有自旁詰之者曰。是書誠善矣。第惟士喻之士。之數無幾。而必專其責備。恐亦難以返人心。而維風俗也。余曰。如子言是。直謂天下無士可也。旣士矣。將自責之不暇。而又奚暇計人之賢否哉。且今之士。大約自視過高。謂吾輩可談性理。此外惟因果報應之說。足以聳其聽聞耳。夫彼固非不信因果者也。彼謂士人取一衿博一第。誠不偶然。及徐而察其存心行事。嘗有欺世而盜名者。甚至風流相尙。詔詔然自目曰名士。名士而踰檢蕩閑。更爲愚夫愚婦所不屑爲。則未嘗不竊竊焉疑之。謂若是何以享榮名登高第耶。所以天道是耶非耶。嗚呼。挽回世道。士之責也。士而

爲人所疑。其又奚以勸人爲耶。近日兗州太守陳達史先生文恭之嗣孫也。癸酉領解粵西。庚辰獲會狀。一入中三元。爲世罕觀聞。其家尤屢世簪纓不絕。亦可知理學名臣。生膺顯仕。而積善餘慶。源遠流長。所云因果報應。誠理有固然者。而究之文恭之意。初非

計及乎此也。然則士之自立。以爲斯人倡。固有無庸外求者矣。客默然無以應。遂書以與彭君。使歸而返命於其尊人。并質之玉衡師。以爲何如也。  
道光八年三月初六日。中江李福源容海謹撰

# 養正遺規序

天下有真教術。斯有真人材。教術之端。自閭巷始。人材之成。自兒童始。大易以山下出泉。其象爲蒙。而君子之所以果行育德者。於是乎在。故蒙以養正。是爲聖功。義至深矣。余每見當世所稱材子弟。大都誇記誦。詡詞章。而德行根本之地。鮮過而問焉。夫在山泉水清。出山泉水濁。緊。豈泉之咎哉。汨泥揚波。父兄之教不先。子弟之率不謹也。弘謀公餘考昔賢養正遺規。擇其簡要可通行者。釐爲一冊。篇帙無多。本末略備。用以流布鄉塾。俾父兄師長。以是教其子弟。毋

輕小節。毋驚速成。循循規矩。雖蒙養之事。而凡所以篤倫理。砥躬行。興道藝者。悉已引其端。由是以之。於大學之塗。庶幾源潔流清。於世教不無少助乎。欽惟聖天子。昌明理學。文治日新。備員圻輔。分路揚鑣。循行風俗。與有人材之責焉。故敢勉竭愚忱。具訓蒙士。爲郡邑先。其或以是爲迂。爲固。爲瑣屑。而愍置焉。余心滋戚矣。

乾隆四年三月既望桂林陳弘謀題於津門官舍

# 訓俗遺規序

古今之治化。見於風俗。天下之風俗。徵於人心。人心厚。則禮讓興而訟端息矣。弘謀前奉恩命。司臬三吳。親承天語。諄諄以惟平惟允。刑期無刑。爲訓勉。敬誌於心。刻弗敢忘。赴蘇之後。清理積案。不下數千餘件。反覆推究。始知獄訟繁多。良由人心漸習於浮薄。或因一念之差。或因纖毫之利。或係一時之忿戾。遂至激而成訟。展轉糾轢。株連日衆。有司承讞。雖悉心體察。極意平反。及曲直分。而身家已破矣。推鞠之下。不禁愀然心傷。因念與其矜恤於獄之旣成。何如化導於訟之未起。夫刑所以弼教。非竟以刑爲教也。司士者平時未嘗教之。而遽以刑之。父母斯民之義。其謂之何。嘗欲於典籍中。採其切於人心風俗。人所習而不察。動而易犯者。刊布民間。以庶幾於弭患未然之計。草創未就。隨有江右之命。封疆攸寄。責任愈重。

撫循化導。使者之職也。區區之心。不能自己。公餘篝火。手披目覽。採餘古今名言。彙爲一帙。名曰訓俗遺規。雖不敢爲所探之悉當。而凡今時所以致訟之由。與夫所以弼訟之道。蓋已略備。大抵理惟取其切近。詞不嫌於真率。務使人人易曉焉。夫天良。人所同具。特患無以感發之耳。賢有司苟能持此以化導。或就事指點。或因人推廣。而士民衆庶。繙閱之餘。觀感興起。父誡其子。兄勉其弟。莫不羣趨於善。而恥爲不善之歸。將見人心日厚。民俗日淳。訟日少。而刑日清。用以仰副聖訓於萬一。是固日夕期之。而不敢不自勉者也。

乾隆七年十月二十二日桂林陳弘謀題於豫章館署

# 從政遺規序

余幼承父兄師友之訓。知肆力於讀書。不以世故紛其心。而賦性迂拙。作輟無常。誦讀不多。體認尤淺。悠悠忽忽。竟不知讀書將以爲何也。迨入仕途。官場事宜。尤未嫺習。臨民治事。茫無所措。未優而仕。不學製錦。心竊憂之。然平時偶有得於聖賢之緒論。合之今時情事。多所切中。此心稍有把握。措之事爲。幸免隕越。不至如夜行者之悵悵何之。乃益悔前此之鮮學。而古訓之不可一日離也。因於簿書餘閒時。一展卷。藉茲陳編。以祛固陋。凡切於近時之利弊。可爲居官箴規者。心慕手追。不忍舍置。不敢謂仕優而學。亦庶幾卽仕卽學之意云爾。方今民生蕃庶。待治方殷。聖天子本躬行心得之餘。布範世誠民之政。有司牧

之責者。益當從根本上講求教養之方。爲民生久遠之計。若僅以因循陋習。了官場之故套。何以上副聖訓。何以符下民望。自惟德薄能淺。無以爲同僚諸君倡。惟奉茲古訓。隨時考鏡。轉相傳布。以此自勉。卽以此勉人。較之門面牌檄。差爲親切焉。蘇子云。藥雖進於醫手。方多傳於古人。自古及今。此心同。此理同。故以古人之方。醫後人之病。而無不立效。願諸君推心理之相同。以盡治人之責。而又參之前言往行。以善其措施。則宜民善俗。或有取焉。幸毋曰業已仕矣。何暇言學。竟等諸古人之糟粕也。

乾隆壬戌長至月桂林陳弘謀書於西江使署

# 教女遺規序

天下無不可教之人。亦無可以不教之人。而豈獨遺於女子也。當其甫離襁褓。養護深閨。非若男子出就外傳。有師友之切磋。詩書之浸灌也。父母雖甚愛之。亦不過於起居服食之間。加意體恤。及其長也。爲之教針黹。備裝奩而已。至於性情嗜好之偏。正言動之。合古誼與否。則鮮有及焉。是視女子爲不必教。皆若有固然者。幸而愛敬之良。性所同具。猶不盡至於背理而傷道。且有克敦大義。足以扶植倫紀者。倘平時更以格言至論。可法可戒之事。日陳於前。使之觀感而效法。其爲德性之助。豈淺鮮哉。余故於養正遺規之後。復採古今教女之書。及凡有關於女德者。裒集成編。事取其平易。而近人。理取其顯淺。而易曉。蓋欲世人之有以教其子。而更有以教其女也。夫在家爲女。出嫁爲婦。生子爲母。有賢女然後有賢婦。有賢

婦然後有賢母。有賢母然後有賢子孫。王化始於閨門。家人利在女貞。女教之所繫。蓋綦重矣。或者疑女子知書者少。非文字之所能教。而弄筆墨。工文詞者。有時反爲女德之累。不知女子具有性慧。縱不能經史貫通。間亦粗知文義。卽至村姑里婦。未盡識字。而一門之內。父兄子弟。爲之陳述故事。講說遺文。亦必有心領神會。隨事感發之處。一家如此。推而一鄉而一邑。孰非教之所可及乎。彼專工文墨。不明大義。則所以教之者之過。而非盡女子之過也。抑余又見夫世之婦女。守其一知半解。或習聞片詞隻義。往往篤信固守。奉以終身。且轉相傳述。交相勸戒。曾不若口讀詩書。而所行悉與倍焉者。意者女子之性。專一篇至。其爲教尤有易入者乎。是在有閑家之責者。加之意而已。

乾隆七年九月既望桂林陳弘謀題於西江使署

# 在官法戒錄序

天下之人。無過善不善之兩途。而人之慕乎善而遠不善也。則不外於法戒之兩念。予有四種遺規之刻。蓋冀天下人。無男女少長。貴賤賢愚。均有所觀感興起。見善者而以爲法。見不善者而以爲戒也。云爾。旣又思之。人有在四民之外。勢所不能無。而又關係民生之利害。吏治之清濁。不可以無化誨者。則官府之胥吏是也。古者三百六十之屬。皆有府史胥徒府掌廩藏者。卽今之庫吏也。史掌文案者。卽今之吏典也。胥卽今之都吏。爲徒之什長。徒卽今之隸卒也。是爲庶人在官。具祿同於下士。其田在遠郊之地。充人掌之。春秋月吉。讀法書。其孝友睦婣。得與於鄉舉里選之列。故當時僚隸輿臺之守法循分。豈惟風俗之醇。抑上之人。教養成就之有其具也。秦燔詩書。人以吏爲師。漢制能諷書九千字以上。乃許爲吏。當時刺

史守相自辟其屬。恆求其賢者。以爲吏而進達之。而吏亦皆束身自好。以靳不負上之知。故一時名公鉅卿。起家掾吏者。不可勝紀。兩漢吏治。最爲近古。非由吏之得人而然乎。魏晉而後。流品遂分。上品無寒門。下品無世族。吏始不得與清流之班。沿及隋唐以降。科貢之勢重。而吏之選益輕矣。然國家設官置吏。官暫而吏久也。官少而吏衆也。官之去鄉國常數千里。簿書錢穀。或非專長。風土好尚。或多未習。而吏則習熟而諳練者也。他如通行之案例。與夫繕發文移。稽查勾攝之務。有非官所能爲。而不能不資於吏者。則凡國計民生。繫於官。卽繫於吏。吏之爲責。不亦重乎。而爲吏胥者。類皆有機變之才智。不能安於畎畝耕鑿之樸。以來役於官。因盤據其間。子弟親戚。轉相承授。作姦犯科。相習熟爲固然。面不知禮義之可貴。爲

官者亦多方防閑之。摧辱之。幾若猛獸搏噬之不可馴擾。夫防之愈嚴。作弊亦愈巧。摧之愈甚。自愛之意愈微。將囂然喪其廉恥之心。以益肆其奸猾狡黠之毒。官吏相蒙。國計民生。於焉交困。而貪昧陋劣之員。受其牢籠牽鼻。淪胥以敗也。又不足言矣。昔劉晏以吏人不可用。謂吏無榮進。則利重於名。我國家立賢無方。吏員一途。咸有進身之階。惟其才之所宜。未嘗限其所至。則固有榮進之可期矣。即或不盡榮進。而其愛一時之小利。必不如其愛身家子孫之大利。更不如其畏身家子孫之奇禍。今試語人以于公治獄之陰德。而子孫駟馬高車。充溢門閭。未有不欣然慕效者也。語以王溫舒舞文巧詆。姦利受財。而梟至於五族。未有不悚然易慮者也。特無以提醒之。遷善遠

罪之良心。無緣而動耳。上以君子長者之道待人。而人不以君子長者之道自待者。非人情也。矧吏胥多讀書識字。粗知義理。習典故。明利害。視田野之愚氓。閭閻之婦孺。其化誨當更易易。爲官者。方日資其心思才力。以成其政治。而顧視爲化外之人。不一思所以化誨之。聽其日習於匪僻。於心何安。而於事又甯有濟乎。余於聽政之暇。採輯書傳所載吏胥之事。各綴論斷。裒爲一冊。名曰在官法戒錄。廣爲分布。以代文告。書曰。作善降之百祥。作不善降之百殃。孟子曰。仁則榮。不仁則辱。觀是錄者。善惡燦陳。榮辱由己。何去何從。必有觀感而興起者矣。

乾隆八年夏四月桂林陳弘謀題於豫章使署

五種遺規總目

|       |        |
|-------|--------|
| 養正遺規  | 二十四則   |
| 訓俗遺規  | 三十則    |
| 從政遺規  | 二十二則   |
| 教女遺規  | 十則     |
| 在官法戒錄 | 三百二十八條 |

# 五種遺規目錄

## 養正遺規

|           |    |
|-----------|----|
| 朱子白鹿洞書院揭示 | 一  |
| 朱子滄州精舍諭學者 | 二  |
| 朱子童蒙須知    | 二  |
| 朱子論定程董學則  | 四  |
| 陳北溪小學詩禮   | 六  |
| 真西山教子齋規   | 九  |
| 方正學幼儀雜箴   | 一〇 |
| 提高學洞學十戒   | 一二 |
| 顏氏家訓勉學篇   | 一三 |
| 朱子讀書法     | 一五 |
| 朱子治家格言    | 一六 |
| 呂近溪小兒語    | 一七 |
| 呂新吾續小兒語   | 一九 |

|                                                                                             |    |
|---------------------------------------------------------------------------------------------|----|
| 陸桴亮論小學 論讀書                                                                                  | 二五 |
| 諸儒論小學                                                                                       | 二九 |
| 程畏齋讀書分年日程                                                                                   | 三一 |
| 陳定宇示子帖                                                                                      | 三九 |
| 王文成公訓蒙教約                                                                                    | 三九 |
| 屠副使童子禮                                                                                      | 四五 |
| 呂新吾社學要略                                                                                     | 四八 |
| 張楊園學規                                                                                       | 五一 |
| 陸清獻公示子弟帖                                                                                    | 五二 |
| 張清恪公讀養正類編要言                                                                                 | 五五 |
| 唐翼修父師善誘法                                                                                    | 五六 |
| 往在津門曾有養正遺規之輯苦於搜羅不廣未<br>愜所願年來由吳門而至豫章公餘開卷凡有切於<br>蒙養者皆爲手錄復得十種并付梓人欲望幼學之<br>士於天真未漓時卽不忘身心交治之功以漸充其 |    |

五種遺規目錄

良知良能之量庶不至高言心性而淪於空虛亦不至汨沒記誦而流於俗學是則區區編輯之微尚也  
乾隆壬戌中秋陳弘謀識於西江使署

訓俗遺規

|            |    |
|------------|----|
| 司馬溫公居家雜儀   | 一  |
| 朱子增損呂氏鄉約   | 三  |
| 陸梭山居家正本制用篇 | 六  |
| 倪文節經鋤堂雜志   | 九  |
| 陳希夷心相編     | 一一 |
| 袁氏世範       | 一四 |
| 許魯齋語錄      | 二七 |
| 陳庭宇先世事略    | 二八 |
| 王陽明文鈔      | 二九 |
| 楊椒山遺囑      | 三二 |
| 沈文端馭下說     | 三六 |
| 呂新吾好人歌     | 三七 |

|             |     |
|-------------|-----|
| 李忠毅戒子書      | 三七  |
| 王孟箕講宗約會規    | 三八  |
| 王士晉宗規       | 四〇  |
| 顧亭林日知錄      | 四五  |
| 陸桴亭思辨錄      | 四八  |
| 朱伯廬勸言       | 五三  |
| 張楊園訓子語      | 五五  |
| 唐灝儒葬親社約     | 六二  |
| 王中書勸孝歌 附八反歌 | 六四  |
| 魏環溪庸言       | 六五  |
| 湯潛菴語錄       | 六七  |
| 魏叔子日錄       | 七〇  |
| 蔡梁村示子弟帖     | 七四  |
| 程漢舒筆記       | 七七  |
| 史搢臣願體集      | 七九  |
| 唐翼脩人生必讀書    | 九三  |
| 王朗川言行彙纂     | 一〇一 |

熊勉菴寶善堂不費錢功德例……………一〇八

## 從政遺規

|                |    |
|----------------|----|
| 呂東萊官箴……………     | 一  |
| 何西疇常言……………     | 四  |
| 王伯厚困學紀聞……………   | 六  |
| 龍圖梅公五瘴說……………   | 七  |
| 許魯齋語錄……………     | 八  |
| 薛文清公要語……………    | 九  |
| 王文成公告諭……………    | 一三 |
| 耿恭簡公耐煩說……………   | 二二 |
| 呂新吾明職刑戒……………   | 二四 |
| 李九我宋賢事彙……………   | 三六 |
| 張侗初却金堂四箴……………  | 四五 |
| 高忠憲公責成州縣約…………… | 四五 |
| 傅元鼎巡方三則……………   | 四九 |
| 袁了凡功過格……………    | 五〇 |

## 五種遺規目錄

|                  |    |
|------------------|----|
| 顏光衷官鑑……………       | 五五 |
| 顧亭林日知錄……………      | 六四 |
| 湯子遺書……………        | 六八 |
| 魏環溪寒松堂集……………     | 七二 |
| 于清端公親民官自省六戒…………… | 七六 |
| 蔡文勤公書牘……………      | 七七 |
| 熊勉菴寶善堂居官格言……………  | 八三 |
| 王朗川言行彙纂……………     | 八七 |

## 教女遺規

|               |    |
|---------------|----|
| 曹大家女誡……………    | 一  |
| 蔡中朗女訓……………    | 三  |
| 宋尙宮女論語……………   | 四  |
| 呂近溪女小兒語……………  | 七  |
| 呂新吾閨範……………    | 九  |
| 王孟箕家訓御下篇…………… | 三五 |
| 溫氏母訓……………     | 三六 |

五種遺規目錄

一四

史搢臣願體集.....四〇

唐翼修人生必讀書.....四三

王朗川言行彙纂 女訓約言.....四七

在官法戒錄

總論共六十二條.....一

法錄共一百六十七條.....一七

戒錄共七十九條.....七〇

# 養正遺規

## 朱子白鹿洞書院揭示

公名熹字元晦宋婺源人諡曰文配祀十哲

弘謀按學也者所以學爲人也天下無倫外之人故自無倫外之學朱子首列五教所以揭明學之本指而因及爲學之序自修身以至處事接物之要則學之大綱畢舉微上徹下更無餘事矣弘謀輯養正規特編此爲開宗第一義使爲父兄者共明乎此則教子弟得所嚮方自孩提以來就其所知愛親敬長告以此爲人之始卽爲學之基切勿以世俗讀書取科名之說汨亂其良知庶耳所習聞兒時亦曉然所學爲何事

父子有義君臣有義夫婦有別長幼有序朋友有信  
右五教之目堯舜使契爲司徒敬敷五教卽此是也學者學此而已而其所以學之之序亦有五焉其別如左  
博學之審問之慎思之明辨之篤行之  
右爲學之序學問思辨四者所以窮理也若夫篤行之

## 養正遺規

事則自修身以至於處事接物亦各有要其別如左  
言忠信行篤敬懲忿窒慾遷善改過

右修身之要

正其誼不謀其利

明其道不計其功

右處事之要

己所不欲勿施於人

行有不得反求諸己

右接物之要

熹竊觀古昔聖賢所以教人爲學之意莫非使之講明義理以修其身然後推以及人非徒欲其務記覽爲詞章以釣聲名取利祿而已也今人之爲學者則既反是矣然聖賢所以教人之法具存於經有志之士固當熟讀深思而問辨之苟知其理之當然而責其身以必然則夫規矩禁防之具豈徒他人設之而後有所持循哉近世於學有規其待學者爲已淺矣而其爲法又未必古人之意也故今不復以施於此堂而特取凡聖賢所以教人爲學之大端條列於右而揭之楣間諸君其相與講明遵守而責之於身焉則夫思慮云爲